

pan cayente

PA E HUBENTUD CU MEGATON DI MENTE

AÑA 1 no 5

mei 1996

Redactor: M.T. Quilotte

GRATIS

Edwin Abath


'It's pay back time'

BESTUURSKANTOOR

Teniendo na cuenta e inquietudnan cu ta bibando ultimamente bow di e hubentud Arubano pa loke ta ser hasi pa nan ariba e nivelnan di mas halto cu ta e aparato gubernamental, Pan Cayente a hiba un combersacion cu sr. Edwin Abath.

Sr. Edwin Abath no ta un persona desconoci, e ta hefe di e Bureau pa Asuntonan di Hubentud.

Na aña 1992 Edwin Abath a hasi su entrada



den arena politico. Hunto cu esaki su preocupacionan pa cu hubentud a bay ariba un otro tipo di plan. Un plan mas ariba tereno politico y di gobernacion. Pa loke ta encera plannan mas concreto pa cu nos hobenan. Un maneho di gobierno pa hubentud. Na november di aña 1994 Edwin Abath a drenta den servicio di gobierno for di su trabow anterior na Dr. Horacio Oduber Hospital.

sigi lesa pag. 13

sr. Edwin Abath di Bureau pa Asuntonan di Hubentud

Dicho di luna:

Eenvoud is het

kenmerk van het ware

Ora cu un persona subi halto den sociedad y toch a keda simpel, ta muestra di cu e ta un bon hende.

WINDMILL

50% 0% - 14 kt 50% Citizen/Seko
20% tel: 35676
paña nobo pa henter famia
caya Betico Croes 82

FOR DI FORNO



Basic One den Pantaya Principal pag.3

Edwin Abath 'It's pay back time'

Edwin Abath su profecion ta logopedista. E la herce e trabow di logopedista for di año 1982.

Den e ramo aki e tin un careda basta amplio den gobierno. E la cuminsa hasi trabownan bow di e ministerio di asuntonan general, cu ta encera labor y educacion, y tambe bow di ministerio di husticia.

Diacuerdo na e acuerdo di San Nicolas accento bastante definí a ser poní ariba esfuertonan y recursonan pa desaroya proyectonan y actividadnan pa nos hubentud. Esakinan ta encera diferente faceta di e bida di nos hobenan. E manera cu e reparti su bida den aspectonan social, aspecto di como un ser cu ta ser educa y e aspecto cu ta encera labor y tambe na momento cu un hoben bay den fout.

Con nos ta bay traha cu su rehabilitacion, kiko nos ta bay hasi den prevencion den e caso di delincuencia hubenil y otro tipo di temanan cu ta rondona e problema di drogadiccion.

A cuminsa door di duna forma na un bureau cu Edwin Abath ta encabesa. Den cual tambe tin Willy Willems cu no ta desconoci an Aruba, cu ta hopi activo ariba e tereno deportivo y recreacional.

A duna forma na na un maneho cu lo bay traha ariba e tereno di prevencion, bow di e ministerionan di educacion y husticia. Ta asina cu a cuminsa cu un evaluacion di e trabownan cu ta ser hasi caba ariba tereno di hubentud.

Nan ta busca contacto cu diferente instancianan bow di e diferente ministerionan. No por hasi ningun esfuerso sin cu esaki nan ta den harmonía. Sin tene consulta cu esnan cu ta haciendo e trabownan pa basta año caba.

E proceso di evaluacion a cuminsa door di aserca e diferente hendenan y tambe e diferente hobenan pa mira kiko ta e necesidanan.

Ariba e acuerdo di San Nicolas, cu ta e maneho di gobierno, a cuminsa na desaroya proyectonan pa e departamentonan y ministerionan.

Asina específicamente ariba e tereno di husticia, a bin elabora un plan cu a hiba e number di "Naar een preventief jeugd beleid binnen het justicieel kader."

Den cuadro di husticia masha poco a ser hasi na definí un maneho pa hubentud ariba tereno di gobernacion.

Esey ariba su mes mester bira un logro grandi den nos sociedad cu dia pa dia mester di mas atencion y cu ta depende di e hubentud cu mester carga bo sociedad di mañan. Kiko bo a duna y zorg pa e grupo aki yega na su "trekken" a cuminsa.

Ta pesey a cuminsa traha ariba ariba un plan di prevencion pa tur hoben cu por haya cu tempo un garantia pa un desaroyo mas balansa. A cuminsa inventarisa pa mira unda e fayonan ta den e systema di KIA. Tambe ki tipo di opvang ta duna na hobenan cu a bay den fout.

KIA ta responde di acuerdo e necesidanan di e grupo aki, tin suficiente elementonan di formacion pa rehabilitacion di nos hobenan? Ariba tereno di reclasering trabownan ta ser hasi pa ora e hobenan sali nan no bay bek den fout.

Ta ser traha ariba castigo alternativo. Gobierno a ripara cu tin hopi buraco den e maneho pa cu nos hobenan. Principalmente pasobra ta carece di un maneho integral. No tin nada concreto pa cu derecho di mucha.

Danki toch na e nivel di

estudio halto cu nos tin, hobenan tin e posibilidad na desaroya na mes debidamente. E maneho integral ta un maneho caminda cu tur e necesidanan, aspectonan cu ta rondona nos hobenan ta wordo tení cuenta cu nan. Por menciona salud, educacion, husticia, bida social etc.. Mas bien e trabownan cu ta ser hasi actualmente ta ariba tereno di enseñansa y husticia. Den e plan nan ta bini dilanti cua ta e hobenan cu nan kier stimula y crea. Hobenan cu ta responsabel pa su comunidad, pa su mes, cu ta crea perspectiva pa un mihor mañan, hobenan cu ta tolerante pa cu otro rasa, cu ta estudioso, cu tin respet, cu ta salud, un hoben cu mañan por para ariba su mes un pia, cu ta garantiza cu nos comunidad por keda draai.

E yiu di e generacionan ey por conta ariba un desaroyo bon balansa.

Bo tin e responsabilidad y obligacion di gobierno, tambe pa provee e beneficio na e ciudadania. E aspecto di organisacionan social cu ta fomenta actividadnan social, cu diferente meta di formacion y educacion di e hobenan.

Edwin Abath ta un fanatico di e hecho cu mester concentra mas ariba e desaroyonan pa nos hobenan. E hobenan mes mester tin mas di bisa ariba asuntonan cu ta concerní nan. Nos a conoce te awor un adulterismo caminda e adulto ta bisa loke e hoben mester, tambe esun cu ta punta dede ariba e hoben. Esey ta un cos cu poco poco mester bay pertenece na pasado. Mester bira algo cu ta bini di tur dos banda a base di un consulta, intercambio di idea y hasi nos hobenan mas responsabel lagando nan papia ariba

asuntonan cu ta interesa nan. Actualmente tin un cantidad di organisacionan caminda hobenan ta bini hunto pa discuti ariba topiconan cu ta na nan interes.

Ta un hecho cu tin hasta gruponan hubenil cu ta sali for di un partido politico. E hecho aki no mester ta asina cu nan tey pa talves solamente apoya e maneho di e partido, sino tambe caminda cu ta necesario pa reclama ariba puntonan cu nan no ta di acuerdo.

Den cuadro di esaki exige ariba nan derecho den e maneho, pasobra desicionan di awe tin consecuencia ariba e generacion di mañan cu ta e hubentud.

Lo ta ideal si por uni tur e gruponan hubenil ariba un nivel caminda cu nan voz tin un voto. Mas espacio mester wordo duna na e hoben pa e por trece dilanti su pensamentonan. Falta e compromiso di gobierno pa cu hubentud, un organismo caminda cu e hubentud pa medio di un jeugdraad of studenten-raad mester por trece dilanti su inquietudnan y deseonan.

Politica tradicional hopi biaha ta prefera pa gruponan no ta organisa, pa asina nan por goberna sin contra-tiempo. Esey no mester ta e approach. Politica no mester ta e fin, e mester ta e medio.

E fin ta ora tur e sectornan den nos comunidad ta den harmonia cu otro, sector laboral, social, gruponan di presion y politica. Esaki ta necesario pa mantene e balanse den bo comunidad. Mas y mas organisacion mester ta bay realisando cu nan mester incorpora hobenan den nan organisacion. E trend rond di mundo ta pa hobenan bay ocupa posicionan den bestuur. Esaki ta ser hasi pa

e reconocimiento y tambe pa e input pa e hubentud pa cu nan mes un realidad. Esey ta loke nos ta haya falta na Aruba, caminda cu nos hubentud ta ser critica demasiado pa e medionan di comunicacion

Esfuersonan. logronan di nos hobenan no ta ser debidamente reconocí.

Nos hobenan mester haya mas espacio pa nan por participa y organisa nan mes. Di otro banda, nos comunidad mester bay exige mas di nos hobenan den un sentido positivo. E hobenan mester haya e oportunidad di ta productivo pa nan mes y pa e comunidad. Loke nos ta wak awendia ta cu nos hobenan ta consumi demasiado di e comunidad. Den e edad critico di 12 año pariba, hobenan ta yega na placa masha facil, di tur caminda, nan ta core den auto, bisti e ultimo moda. Placa cu talves ta bini di e mayornan. Den e forma aki bo no por bisa cu bo ta formando un persona cu mañan por bay para ariba su mes un pia.

A bira tempo pa e hobenan para pa nan responsabilidad y duna comunidad bek loke comunidad a duna nan, it's pay back time!

Mensaje pa hubentud

Pa hubentud tin respet pa su mes, pa e grandinan. Pa hubentud ta mas estudioso, considera estudio como un vehiculo cu bo por yega un caminda mañan. Tur cos por bin facil, pero sacrificio ta locual ta siña nos bira hende. Sacrificionan cu ta bin door di hasi trabownan na beneficio di bo comunidad. No lubida cu bo ta parti di e comunidad, cu bo tin un rol, un opinion, trece esaki den practica, no tuma un posicion pasivo, pero activo!